

修訂日期: 2004/10/21 發行日期: 2006/2/15

發行單位: 中華電子佛典協會 (CBETA) <http://www.cbeta.org>

資料底本: 大正新脩大正藏經 Vol. 20, No. 1104

原始資料: 蕭鎮國大德提供, 北美某大德提供

No. 1104

佛說聖多羅菩薩經

西天譯經三藏朝散大夫試光祿卿明教大師臣法賢奉 詔譯

如是我聞。一時佛在香醉山五髻乾闥婆王宮。彼有種種鼓樂弦歌出微妙音。

爾時世尊處大殿中。與諸菩薩摩訶薩眾俱。復有諸大聖眾皆來集會。所謂有學無學諸聲聞眾。并無量無邊天龍夜叉乾闥婆阿脩羅迦樓羅緊那羅摩睺羅伽人非人等。復有無量無邊成就持明持金剛者。金剛手及忿怒王持明王百千等眾。復有具種種持明寶髻佛頂輪王等眾。復有宿曜并母鬼母鬼主。及諸釋梵大自在天那羅延天慶自在天大黑天神童子天夜摩天水天風天四天王天并五通仙人等。俱來在會作廣大供養。圍繞承事合掌恭敬。

爾時世尊處於眾會。譬如須彌顯于大海。是時五髻乾闥婆王。與七十二百千乾闥婆女。作種種妓樂來詣佛所。到已頭面禮足。繞佛三匝却住一面。合掌向佛而作是言。世尊我今願聞利益之事。唯願世尊為我宣說。彼聖多羅菩薩。即是諸佛如來之慈心。是大明王降魔最勝。是大持明是大輪王。廣顯甚深具大勢力。唯願世尊悲愍於我及天人阿脩羅等。常得利益獲安樂故。宣說聖多羅菩薩一百八名。爾時世尊受五髻乾闥婆王請已。讚言善哉善哉乾闥婆王。汝能問於如來如是之義。令諸天人一切眾會。得大利益獲安樂故。汝當諦聽善思念之。我今為汝次第宣說。時彼乾闥婆王聞佛語已受教而聽。

爾時世尊為彼乾闥婆王及一切眾會。先說聖多羅菩薩陀羅尼曰。

那莫三滿多那哩始(二合)毘藥(二合一)薩哩嚩(二合)怛他(引)誡帝(引)毘踰(二合引二)阿囉曷(二合)訥毘藥(三合三)三藐三沒提(引)毘藥(二合四)那謨(引)婆誡嚩帶曳(二合引五)阿哩也(二合)多囉曳(引六)唵(引)薩哩嚩(二合)怛他(引)誡多(引七)怛他多部(引)多訶(引)致(八)波哩戍提沒提(引)薩哩嚩(二合)怛他(引)誡多(九)薩哩嚩(二合)達哩摩(二合)多(引十)誡誡那阿末羅尾戍馱(引)達哩摩(二合)帝(引十一)摩賀(引)那野波哩嚩(引)哩莎賀(引十二)

爾時世尊說此陀羅尼已。復為乾闥婆王及一切眾會。宣說多羅菩薩一百八名。而說頌曰。

是多羅菩薩	本從阿字生
或生諸行相	不生亦不滅
是相如虛空	虛空性生故
隨應現本相	相一多無礙

色相現無邊
常現幻化相
攝大真實理
施於無所畏
離諸怖畏苦
能解三有縛
成就法能為
唯施最上法
亦從總持生
相應大自在
不即相應相
定意常不動
常處蓮華座
目淨如青蓮
清淨最殊妙
佛慧眼無漏
常發大悲心
亦從大悲生
難伏垂悲愍
所有苦惱者
法施甘露味
苦海意清涼
普世為照耀
眾寶珠髻冠
摩尼真珠飾
螺文相右旋
不善者令善
無喻莊嚴身
寂靜常安樂
六念具六通
善說四諦法
幻化苦海中
持劍破煩惱
鉢致仗及槍

善寂體純一
密語真實語
真實行常行
寂靜常除患
善破煩惱籠
苦海悉永離
自他俱成就
總持自在王
施總持大義
心意具相應
相應相不離
有動皆寂然
亦從蓮華生
常為眾生日
慈眼視眾生
具純一大悲
常行大悲行
常具大悲心
以悲普遍降
除苦令歡喜
濟苦獲安樂
是名自在母
妙容熾盛光
清淨光圓滿
髮髻色紺青
莊嚴無為體
一切願皆圓
善意亦善逝
大力如意通
得諸波羅蜜
開迷大辯才
現行幻化相
弓箭與三叉
都摩囉燦帝

沒識囉金剛
觀視所持箭
手擲金剛杵
能伏外敵軍
具大智慧力
諸闇煩惱銷
如日銷昏冥
善度輪迴海
實際住唯真
常施愛敬願
歡喜施常行
是即如來智
戒相具足持
梵音甚微妙
微妙一響聲
善生諸世間
三乘為依怙
解脫三乘教
五面亦五眼
正覺成菩提
一切種種相
皆隨應現生
自能達彼岸
隨意化百千
百千福具足
善捨一切財
世間大自在
持妙青色蓮
樂善常寂靜
諸惡障永除
度難與安樂
鬪諍悉永除
部多主宰母
現身為大龍

種種諸器仗
悉施無所畏
現作無礙通
表刹現幢相
善破勇猛軍
魔冤賊悉破
是為上最勝
最上大吉祥
名聞稱普遍
自勝復勝他
微妙最善寂
普仰如意珍
以戒行正道
三世最上音
如虛空大藏
無諍依怙者
依行行三乘
諸佛依三乘
依五智性生
即是大正道
殊妙清淨身
照世如宿曜
亦善渡他人
巧攝諸善義
純一化世間
種種幻化相
吉祥諸天尊
具戒施諸願
大靜慧焰光
是一切魔主
無等平等心
善離怖畏死
示作夜叉王
具百頭千目

百舌大惡相	真實無畏心
勝種具百千	地天善持世
常樂無畏語	疾疫毒永除
殊妙大光明	無垢常清淨
一切世間母	持法利世間
最勝灌頂王	所作皆已辦
具十波羅蜜	十地位常居
藏顯十法乘	十大真實理
住十金剛句	表刹十法成
十智除闇冥	觀世自在眼
具大妙色相	等虛空無邊
或現五通仙	具戒自在相
離欲身應供	寂靜道常安
正覺所讚揚	是多羅菩薩

爾時世尊說此頌已。告乾闥婆王及一切眾會。此是多羅菩薩一百八名。我已為汝宣說。汝等應當至心。受持此多羅菩薩一百八名及陀羅尼。過去未來諸佛已說當說。為一切眾生利益悲愍故。若有善男子善女人發至誠心。於清旦時或為自他。誦此多羅菩薩一百八名并陀羅尼。乃至默念。或用匹帛為[巾*(穴/登)]。或於淨壁依法。以最上妙色畫菩薩像。或用檀香木作菩薩形。以清淨心隨意成辦。然後於菩薩像前設種種供養。一日三時合掌作禮。依法至心而作觀想。誦此一百八名及陀羅尼。此多羅菩薩具大勢力。最上吉祥求銷諸罪。善破魔軍於初中善。而能施彼成就之法。若復有人發至誠心。持念一遍七遍乃至二十七遍當念誦時不闕文句。是人一切富貴吉祥之事及成就法。隨願獲得永無障礙。得諸賢聖隱其本身常作擁護。又復得天龍夜叉釋梵護世那羅延天大自在天。并母鬼主大黑天神頻那夜迦慶自在天等。乃至得諸佛菩薩緣覺聲聞一切忿怒王大威德明王等咸作是言。善哉善哉善男子。汝等具於諸佛菩薩之行。當生蘇珂嚩帝佛刹。是時五髻乾闥婆王。歡喜踊躍心生信重。即從座起自解己身。無價瓔珞金銀真珠摩尼珍寶種種嚴身之具。供養於佛合掌恭敬。瞻仰世尊而說讚曰。

善哉世尊	甚奇善逝	常以悲心
救護一切	而能為我	及於眾會
說此最上	真實之義	

爾時世尊說是經已。彼諸菩薩摩訶薩。及諸聲聞并持明者。大忿怒主一切明王。諸天人眾及五髻乾闥婆等。聞佛所說皆大歡喜信受奉行。

